

МОЛИТВЫ ПЕРЕД НАЧАЛОМ ЧТЕНИЯ ПСАЛТИРИ

*Разумно да будет,
како подобает особь пети Псалтирь*

Аще иерей, глаголет:

Благословѣн Бог наш, всегда, ныне и присно и во веки веков.

Аще ли ни, глаголи умиленно: **Моли́твами святы́х отѣц на́ших, Го́споди Иису́се Христе́ Бо́же наш, помилуй нас.**

Аминь. Царю́ Небѣсный. Трисвятое. И по Отче наш...

Тропари сия, глас 6

Помилуй нас, Го́споди, помилуй нас, всякаго бо отвѣта недоумеюще, сию́ Ти моли́тву я́ко Влады́це грѣшнии прино́сим: помилуй нас.

Слава: **Честно́е проро́ка Твоего́, Го́споди, торжество́, Не́бо Це́рковь показá, с челове́ки ликуют Ангели. Того́ моли́твами, Христе́ Бо́же, в ми́ре упра́ви живо́т наш, да поём Ти: Аллилу́иа.**

И ныне: **Мно́гая мно́жества мо́их, Богоро́дице, прегрешéний, к Тебе́ прибе́гох, Чи́стая, спасéния трéбуя: посети́ немощствую́щую мою́ ду́шу и моли́ Сы́на Твоего́ и Бо́га на́шего да́ти ми оставлéние, я́же соде́ях лю́тых, Еди́на Благословéнная.**

Го́споди, помилуй (40). И поклонися, елико ти мощно.

**Таже молитва
Святей Живоначальней Троице**

Всесвятáя Тро́ице, Бо́же и Содéтелю всего́ ми́ра, поспеши́ и напра́ви се́рдце моё, нача́ти с ра́зумом и конча́ти де́лы благими́ богодухновéнными сия́ кни́ги, я́же Святы́й Дух усты́ Дави́довы отры́гну, ихже ны́не хо́щю глаго́лати аз, недосто́йный, разуме́я же своё невéжество, припа́дая молю́ся Ти, и е́же от Тебе́ по́моци прося́: Го́споди, упра́ви ум мой и утверди́ се́рдце моё, не о глаго́лании устéн стужáти си, но о ра́зуме глаго́лемых веселитися, и пригото́виться на творéние до́брых дел, я́же учу́ся, и глаго́лю: да до́брыми де́лы просвещéн, на суди́щи десны́я Ти страны́ причáстник

**бúду со всéми избранными Твоими. И ны́не, Влады́ко, благослови́,
да, воздохну́в от се́рдца, и язы́ком воспою́, глаго́ля си́це:**

Прииди́те, поклони́мся Царéви на́шему Бо́гу.

Прииди́те, поклони́мся и припадéм Христу́, Царéви на́шему Бо́гу.

**Прииди́те, поклони́мся и припадéм Самому́ Христу́, Царéви и Бо́гу
на́шему.**

Таже посто́й мало, дондеже утишатся вся чувства. Тогда сотвори
начало не вскоре, без лености, со умилением и сокрушенным сердцем.
Рцы сие: «Блажен муж...» тихо и разумно, со вниманием, а не борзяся,
якоже и умом разумевати глаголемая.